

Variat 1: .. magnitudine paullo minore, aut majore.

2 . . fascia coleopterorum mox tridentata, mox quadridentata, mox dentibus irregularibus et obsoletis in fasciam fere integram abiens.

3 . . punctis elytrorum marginalibus, quæ interdum tria, quatuor, quinque, aut sex, quæ distincta, aut connata in lineolam marginalem integram, aut interruptam.

OBSERVATIO. *Buprestis pilosellæ* valde affinis varietati *Buprestis discoideæ* in tab. 10, fig. 65 entomologiæ D. OLIVIER depictæ, at hæc aut cum nostra minime convenit, et tunc *Buprestis pilosellæ* pro nova specie procul dubio habenda, aut cum nostra una et eadem species est, et tunc pro varietate *Buprestis discoideæ* haud rite delineavit celeberrimus Entomologus, nam *Buprestis pilosellæ* discum elytrorum albidum semper, nec testaceum habet, et hunc nunquam uti *Buprestis discoidea*, interruptum. Insuper adde quod *Buprestis discoidea* apud nos nunquam inventa fuerit, et proportionibus corporis a nostra saltem nonnihil differat.

SPECIES 26.

Cerambyx miles.

C . . . thorace rugoso subspinoso, niger,

elytris apice testaceis rotundatis, antennis maris mediocribus, fœminæ brevioribus.

Habitat obvius in toto Pedemontio in quercubus, quarum truncis victitat larva; *cerambyce heroe* serior et rarior; vespere sæpe volitantem vidi, et copulam interdum observavi.

Inter europeos cerambyces post *Cerambycem heroem* facile maximus, cum magnitudine illi vix cedeat, statura etiam simillimus. Corpus totum nigrum solis apicibus elytrorum testaceis, et rotundatis. Thorax rugosus, maris vix spinosus, fœminæ inermis; antennæ corpore dimidio breviores in fœmina, vix corporis longitudine in mare.

Ut species facilius distinguantur, en hic *Cerambycis herois* maris et fœminæ accuratam atque comparatam descriptionem. . . . Corpus nigrum elytrorum apicibus piceis angulo interno spina terminatis (in *Cerambyce milite* dilutius piceis sive testaceis, et rotundatis). Thorax rugosus spina utrinque valida in mare, valde distincta licet minore in fœmina (in *Cerambyce milite* spina thoracis in mare fere obsoleta, in fœmina omnino nulla). Antennæ corpore et dimidio longiores in mare, corpore haud breviores in fœmina (in *Cerambyce milite* antennæ maris corporis longitudinem, fœminæ dimidiam longitudinem æquant).

Longitudo corporis *Cerambycis herois* lin. 22 circiter,
 Latitudo maxima » 7
 Longitudo *Cerambycis militis* » 18
 Latitudo maxima » 5

OBSERVATIO. In *Cerambyce heroe* mas sæpius maximus, in *Cerambyce milite* mas sæpius minimus.

SPECIES 27.

Saperda plumbea.

S . . . plumbea, immaculata, elytris virescentibus, fronte albo-villosa, scutello niveo, antennis mediocribus.

Semel inveni fine maii in salice secus rivum di Sassi dictum. Semel etiam a D.^{re} FERRERO lecta.

Magnitudo *Saperdæ cylindricæ*, statura elongata fere *Saperdæ erythrocephalæ*, Thorax brevis, inermis, cylindricus, immaculatus. Elytra punctulata, subrugosa, nuda, apice paullulum fastigiata, pedes mediocres, corpori concolores, antennæ filiformes, nigrae, immaculatæ.

SPECIES 28.

Callidium abdominale.

C . . . thorace sublevi nitido, nigrum albo-villosum elytris fuscis, abdomine fulvo, antennis brevioribus.

